

悼 亡 词

沈星炜

亡妇江来归四年，情好綦笃，丁春月吉，举丈夫子，遂得羸疾，渐成不起，病中令余坐榻前，絮话一切。弥留时仅一执手而已，痛定悲来，不能自己，援作临江仙十首：

记得楼头深夜语，几分春到梅花。天寒翠袖薄罗遮，月和人瘦，透影入窗纱。

今日琐窗成独倚，无憀忆遍年华。东风依旧满天涯，断肠玉笛，吹梦入谁家？〇

记得春前江上别，离愁黯尽黄昏。罗巾空惹旧啼痕，香寒被角，应许梦温存。

不信浮云吹忽散，而今真个销魂。此情欲语更谁论？迢迢彩石，何处问西昆？〇

记得沧江归路晚，飞鸿远寄相思。三生恩义少人知，红笺记注，珍重乍开时。

一别秋风人隔世，锦书惆怅何之？泪凝鹄枕雁来迟，凄凉心事，望断碧云祠。〇

记得画眉窗下立，粉香轻浣罗衣。落花消瘦草痕肥，翠分浅黛，一角远山低。

痛绝当年京兆笔，柔情已逐云飞。月中环佩是耶非，空余遗挂，掩幔却依稀。○

记得荆花开五树，东风忽殒双枝。谢庭残雪燕归迟，衰亲健在，犹赖汝维持。

何事仙云才现影，玉箫又动离思，伤心阿母最堪悲，七年一瞬，三度丧琼枝。○

记得良言曾劝我，读书须惜分阴。功名水到自渠成，忍将心力，轻弃十年情。

毕竟珊瑚沈断纲，梦花空许相寻。西风无那又飘零，青灯负我，我自负卿卿。○

记得天涯逢七夕，掐云初见秋河。可堪经岁别离多，绿窗消息，争奈薄情何！

似此星辰原昨夜，剧怜潘鬓蹉跎。阴阴凉月转垂萝，阑干风露，盥水欲生波。○

记得绣帘风影细，并刀乍剪轻纨。彩丝无力挽双鸾，絮痕着处，点点唾花寒。

几向空房寻旧迹，新愁又上眉端。模糊卷本鼠拖残，年时针线，和泪更重看。○

记得凉飙吹碧树，愁心不耐清秋。短衣喜趁薄寒收，遥知临篋，中夜自绸缪。

太息年华同逝水，孤蟾影破琼钩。寂寥庭院晓霜浮，茧丝抽尽，双泪冷香篝。○

记得伤心临去日，喘丝欲断还连。相持纵有万千言，不成一语，忍痛向重泉。

曾是达人应作达，此情何计周旋。茫茫来日快抽鞭，好将心事，同证后身缘。